

AWIG-AWIG



**DESA ADAT DARMASABA
KECAMATAN ABIANSEMAL
BADUNG**

SARGA I

Pawos 1, Palet 1

ARAN LAN WEWIDANGAN DÉSA

Aran

1. Désa Adat puniki mawasta Désa Adat Darmasaba

Wawidangan Désa

2. Jebar kakuwub wawidangan Désa Adat Darmasaba mawates si :
Sisi wétan/ sisi kangin : Tukad Ayung
Sisi kidul/ sisi kelod : Blumbang, Subak Dalem
Sisi kulon/ sisi kauh : Panundikan, Yéh Rarangan
Sisi Lor/ sisi kaja : Tukad Ayung
3. Desa Adat Darmasaba puniki kawangun antuk karang ayahan Désa kaepah dados petang Banjar Adat luwir ipun :
 - a. Banjar Adat Penénjoan
 - b. Banjar Adat Darmasaba
 - c. Banjar Adat Menésa
 - d. Banjar Adat Cabé
4. Wawidangan palemahan Banjar suang – suang kamanggehan antuk peruman Banjar Adat.
5. Banjar wenang kaepah dados tempekan – tempekan marupa daha/teruna muah sane siosan – siosan manut kawigunan Ipun.
6. Banjar wenang ngardi awig – awig sane mauger – uger antuk awig – awig Desa kalih tan wenang maimpas/tungkas saking peraturan Pemerintah.
7. Banjar patut maduwe peranti makadi Balai Banjar.Pura Malanting lan Kulkul

SARGA II

PAMIKUKUH LAN PATITIS

Pawos 2

Desa Adat Darmasaba ngemanggehan pamikukuh :

- a. Pancasila kadi munggah ring pembukaan UUD 1945
- b. Undang – undang dasar 1945 pamekas pasal 18
- c. Tri Hita Karana manut tatwaning buana agung

Pawos 3

Patitis Desa Adat Darmasaba

1. Mikukuhan miwah ngarajegan sang hyang agama.
2. Nginggilang pawertening Agama Hindu.

3. Ngarajegang sukertaning desa saha pawongannya sekala lan niskala.
4. Nincapang pangeweruh kas usilan lan pangupajiwa.

SARGA III

TATA PAKRAMAN

Palet : 2

Pawos : 4

Sang jumenek ring Desa Adat Darmasaba

1. Sahananing sang jumenek mapausahan ring wawidangan Desa Adat Darmasaba sinanggeh wong Desa Darmasaba.
2. Sane kabaos krama Desa Adat Darmasaba, Wong Desa sane maagama Hindu magenah ring kakurub wawidangan Desa Adat Darmasaba.
3. Sejaba punika manut (2) ring ajeng semanggeh tamiu.

Pawos 5

Pawilangan krama Desa Adat Darmasaba

Krama wenten 4 soroh bacakan ipun kadi ring sor :

1. Krama ngarep, wong Desa sane nanggap karang Desa.
2. Krama paron, wong desa sane sampun madue tanah, utawi karang paumahan tur sampun jenek sanistane 6 sasih
3. Krama panyade, wong Desa sane wenten dedandanan waris saking krama ngarep.
4. Krama pangele, wong Dura Desa sane jumenek ring krama ngarep.

Pawos 6

Ngaranjing dados krama Desa Adat Darmasaba kadi ring sor :

1. Sangkaning pinunas
2. Sangkaning ngamong karang desa
3. Sangkaning pawiwahan
4. Sangkaning nganutin pararen desa.

Pawos 7

Swadharmaning krama Desa Adat Darmasaba

Dharmaning krama Desa kadi ring sor :

1. Nyejerang saha tinut ring dagung awig – awig.
2. Bakti kalih sutindih, paramabela ring desa
3. Natak panes tia kertin desane antuk ayah, urunan miwah sakeluirnye manut dresta lan pararem.

Pawos 8

Swadharmaning Tamiu sesampun jenek langkungan ring 6 sasih patut mapaweh dana/punia marupa ayah.arta berana sajeroning ngarti kablikang Desane.

Pawos 9

Wewenang krama Desa Adat Darmasaba.

Polih pasayuban kalih kakertan rekalaning kakenan panca baya, kauunggahan ring sejeroning awig – awig pararem Desa. Banjar sane marupa penyacah awig – awig desa punika.

Pawos 10

Wewenang tamiu

Polih kasayuban kalih kasukertan rikalaning kakenan panca baya,kauunggahan sajeroning pararem/banjar.

Pawos 11

Ayah kalih urunan krama Desa Adat Darmasaba

1. Krama Ngarep,krama paron wenang ngemedalang ayah lan urunan mepek.
2. Krama penyade, krama pangele ngamedalang ayah lan urunan ngamanggehang manut kaputusan pararem Desa.
3. Balu ngalentik kena ayah atenga yan ipun balu luh keni ayah luh kawanten, asapunika taler balu muani keni ayah muani kawanten lan urunan mapek.
4. Balu ngempu (balu madue ayah penyade) keni ayah lan urunan mapek.

Pawos 12

Luput ayah.

1. Sane polih luput ayah : para juru, pemangku khayangan tiga, kahyangan, sonteng salaminya prajuru kalih pemangku.
2. Warga sane wawu nanggap karang polih luput 6 sasih salamin – laminne ngantos penumayennya tedun ngayah.
3. Warga desane sane kaninggilang linggihnya manut pararem.

Pawos 13

Krama dados mapuangkid , masusukan kalih numbas ayah.

1. Kengin mepuangkid sahantukan sungkan, matepetan kaluasan.
2. Lamun mapuangkid kasuksara ring para juru nganutin babuatnyane.
3. Kengin masusukan sahantukan krama inucap sampun lingsir tan maresidayang ngayah kalih sungkan sungkanang.
4. Kengin numbas ayah, karma paron, krama ngare sane arang ring purinnya makadi dados parayoga lan saponunggilan ipun, Agung/alit manut putusan pararen Desa/Banjar.

Pawos 14

Wusan dados krama sangkaning.

1. Panunas ngaraga, manawi kasah ka dura Desa kalih sane tiyos – tiyosan.
2. Kanocayang duaning tungkas ring awig – awig Desa Adat Darmasaba tur tan prasida ngesahin maprawerti sotata ngawe biota.

Pawos 15

Sane wusan makrama Desa, mangde :

1. Yan nagwit ayah ngarep patut ngaturang karang ayahannya ka Desa.
2. Sang wusan makrama Desa tan polih pah – pahan padruwen Desa.

Palet 3

Pawos 16

Indik prajuru Desa Adat

1. Desa Adat Darmasaba kaenterang antuk Kelian Desa kasanggra antuk :
 - a. Patajuh utawi pangliman junaka wakil Kelian Desa
 - b. Panyarikan utawi juru tulis.
 - c. Wakil – wakil banjar pinaka pamukan banjar sane kainggilang olih banjarnya.
2. Banjar Adat kaenterang antuk kelian Banjar Adat/Patus kasanggra antuk :
 - a. Pangliman pinaka wakil kelian Adat/Patus.
 - b. Kasinoman akehnya manut kawigunan.
3.
 - a. Suwen dados Kelian Desa, pangliman pinaka wakil limang warsa tur kengin kapilih malih.
 - b. Wakil – wakil Banjar pinaka panua banjar nganutin pararem banjar.
 - c. Kelian Adat/Patus miwah pangliman asapunika taler kasinoman nganutin awig – awig.

Tata cara ngadegang kelian desa adat miwah prajuru desa tiyosan.

Pawos 17

Ngadegang Kelian Desa Adat

1. Krama Desa sane patut kandegang Kelian desa Adat.
 - a. Mawit saking krama ngarep.
 - b. Mayusa sanistane 25 tiban
 - c. Uning ring tata Adat Agama Hindu
 - d. Tan kataman cedangga kalih cendala.
2. Tata cara pemilihan kelian Desa Adat

- a. Pamilihan kautsahang malarapang antuk gilik saguluk
- b. Prade tan prasida suara akeh marupa pamutus
- c. Pamargin pamilihan manut pararem miwah gaguet sane kamedalang pinaka pakukuh lan pamitegep Awig – awig Desa Adate.
- d. Patajuh utawi pangliman pinaka wakil kelian desa kasudi oleh Kelian Desa Adat.
- e. Penyarikan nenten kapilih nganutin lalintihan (turunan) wakil – wakil banjar kasudi olih banjarnya.

Pawos 18

Swadharmaning Kelian Desa Adat Saha Parajuru Tiosan

1. Ngenterang nadagingi awig – awig Desa Adat miwah putusan pararon desa adat.
2. Nuntun kalih ngenterang karama rauhring warga desane ngupadi patitis desane.
3. Maosin kalih niwakang pamutus wicara luwire :
Yan sang mawicara sami – sami. Sajeroning banjar, wenang kelian banjar nguwehin pamutus, asapunika taler yan sang mawicara sami – sami sajeroning Desa wenang Kelian Desa Adat niwakang pamutus.
4. Prade sang mawicara tan cumpu ring pamutus kelian banjar/ kelian desa adat wicara inuncap patut kalantarang ring sang mawarat.
5. Kelian desa adat rikala maosin wicara kasanggra oleh wakil – wakil banjar.
6. Wicara sane wenang kabaosin/kawahin pamutus i wong desa sane nungkasin awig – awig desa adat kalih pararon desa adat.

Pawos 19

Ulih – ulihan parajuru desa adat:

Kelian Desa polih catu sawah.

Cenengan sahanan duman ring desa.

Muwah ulih – ulihan sewosan manut putusan pararon.

Pawos 20

Para juru kagantosin

1. a. Seda / padem
- b. Wit saking penunas
- c. Ninggal desa tan malih mawali
- d. Mabukti nyisuang druwen desa tur agung iwang ipun
- e. Keni hukuman mabui.
- f. Nganecang parajuru/ngentosin patut sajeroning peruman tur kaingkupin antuk i krama desa.
Prade kelian desa adat meraryan sadurung panumayan ipun swadarmanya kamargiang olih wakilnyane jantos sampun panemayan ipun.

Pawos 21
Pamidanda Yan Ten Tinut Dados Parajuru Desa Adat

Sapa sira ugi kapilih bilih kapilih/kasudi antuk krama desa prade piwal kakeniang denda manut putusang pararem desa.

Palet 3
Pawos 22

Indik kulkul

1. Ring wewidangan Desa Adat Darmasaba wenten kulkul petang soroh luwire :
 - a. KulKul pura (pejenengan)
 - b. Kulkul desa
 - c. Kulkul banjar
 - d. Kulkul sekehe
2. Kulkul wenang angge pengasri yadnya miwah tetenger midabdabin kramannyane soang – soang manut dudonan tatepekan.
3. Kulkul pura (pajenengan) katepak rikalaning Dewa Yadnya.

Pawos 23

Tata tatepakan

1. Kulkul pajenengan desa,banjar,sekehe tabuh kadi ring sor.
2. Kulkul pura/pajenengan katepak rikalaning wenten
3. Dewa yadnya pinaka pangasrem yadnya tatepakannya nung,ting.
4. Pangujiwat parum utawi makarya atulud ngembat.
5. Rare embas/medal lanang kelentungan
6. Kelayu sekar/padem atulud ngembat kawewehin tigang kalentungan.
7. Ngerangkat/kecalang daha duang kalentungan
8. Kamalingan / kecalan bulus atulud
9. Katiben geni baya bulus atulud katambah ngembat panjang
10. Palagendangan bulus kalih tulud
11. Kebaak, kaamuk sehananing bhaya pati bulus tigang tulud yan wenten tatepakan manut ring ajeng, patut suaran kulkul punika katanggurin kulkul suwang – suwang banjar.
12. Ngembak, atulud ngembat

Pawos 24

Kulkul Katepak

Kulkul desa utawi banjar katepak sangkaning pituduh para juru desa / banjar.
Sang nepak kulkul sangkaning baya, patut digelis supeksa ring 1 para juru.

Krama desa/banjar patut nedunin suaran kulkul makta peranti manut tatengeran sahe lumaksana ketuntun antuk krama sami lanang ipun.

Pawos 25

Kulkul Katepak Sangkaning Ten Gumanti

Yen wenten jatma sane nepak kulkul sangkaning manah iseng/tan gumanti (tata tatepakan) Keni jatan kadenda agung/alit manut pararem.

Palet 4

Pawos 26

Indik parum

Paruman desa kawentenang sakirang – kirangnya ngatahun apisan nangken sasih kadasa (wusan penyepian)

Ring paruman desane para jurune patut nyiarang pamargin ngentarang desane pamekas indik :

Pakraman miwah ayah – ayahan.

Harta brana duwen desa

Sahane wicara sane kbawosin saha pamutusnyane. Pararem miwah paguet sane kamedalang pinaka pakukuh, pamitegep awig – awig desa adate.

Paruman parajuru dosa lan wakil – wakil banjar

Kawentenang sajeroning wenten wicara, parindik mabuat kabaosin

Pawos 27

Tata – Titi Parum

Sang sane ngemiletin parum mabusana adat (mawasta lan nyelempot). Rikalaning parum patut kawentenang sane saha runtutan ipun magenah ring ajeng sang rumaos, tur ngatur piuning ring peranti ring bale desa / banjar mekadi ring melanting kalih ring kulkul.

Pawos 28

Paruman kakawitin

Paruman pras ida lumaksaba prade sampun katedunin antuk 1 krama desa lintang ring atenga akehnyane.

Pawos : 29

Kaputusan sinanggeh sah

Sahanan pamutus kautamayang malarapan antuk cilik saguluk.

Prade tan sida kaputusan paruman sinanggeh sah yan sampun kasungkemin lintang ring atenga.

Palet 5
Pawos 30

Indik Druwen Desa

Padruwen Desa Adat Darmasaba makadi:

Kahyangan Tiga makadi pura : Desa, Dalem, Puseh, Pura Gunung Agung, Pesimpangan Besakih, Pura Taman Cengana.

Prajapati kalih palemahannyane sane magenah ring setra:

- Br. Cabe
- Br. Darmasaba

Balai Desa

Tanah Laba Pura

Karang Ayahan/PKD

Pawos 31
Paupon-Upon Laba

Paupon upon laba pura kalih druwen Desa kaenterang antuk para juru Desa.

Pikolih lan upon-upon pura patut kaangge prabiya wawangunan miwah sane siosan manut kawigunan ipun.

Nyabran sangkepan Desa I para juru sane ngamong druwen Desa patut nyiarang munjuk lungsur druwen desane

Sakaluiring druwen Desa patut wenten ilekitan ipun.

Tan kalugra ngingsining/ngicalang druwen Desa makadi ngalah-alah, ngadeang yan tan polih panugrahan saking I krama Desa

Palet 5
Sukerta lan Pamitegen

Kaping 1
Pawos 32

Paindakan Karang Desa

1. Sane kasinanggeh Karang Desa manut tri hita karana:
 - a. Utama angga (karang ulu) genah ngarcana muah ngastawa Ida Sanghyang Widhi Wasa makadi genah Pamerajan/Sanggah
 - b. Madya Anga : pupualn karang pausahaan makadi genah ngwangun sakaluir tatangunan.
 - c. Nista angga (karang teben) : teba
2. Utama angga, madya angga, nista angga :
Sinangguh bawa maurip maukudan jangkep tan wenng kapalih palih

3. Sahananing karang inucap ring ajeng (Utama angga, madya angga, nista angga) tan wenang tur tan kengin kaadol utawi kasilurang antuk tanah tiosan diastun tanah inucap mapipil.

Pawos 33
Manggapang Karang Desa

1. Prade wenten karang ayat katanggapang sang matanggapang patut masadok ring Kelian Desa/Kelian Banjar.
2. I Kelian Desa miwah Kelian Banjar nureksain papayonan tumuwuh lan papyonan paumahan (tatangunan/wawangunan) sane wenten ring Karang Desa inucap.
3. Sang sane kawehin nanggap kautamang krama banjarnya sane pinih akeh krama panyandene bilih sane nyaratang akeh krama panyandene pateh wenang kaundi (malarapan lotre) sane polih kengin nanggap tur ngayahin.
4. Prade ring banjarnya tan wenten sane nyaratang wenang kaatur ring Desa.
5. Karang Desa sane kagambel olih Desa, prade katanggapang kautamayang sane pinih akeh krama panyandenne ring wawidangan Desa Adat Darmasaba, bilih sane nyaratang krama panyandenne pateh taler malarapan undian (lotre), sane polih kengin nanggap tur ngayahin.
6. Indik pangargan papayonan temuwuh lan papayonan paumahan kajantenang ring ajeng paruman prajuru Desa Adat pinaka upasaksi, 5 % saking pangadolnya ngranjing kas Desa.

Pawos 34
Nanggap Karang

1. Sehananing anak nanggap karang masengker 6 sasih sang nanggap patut malinggih/magenah ring karang punika.
2. Prade sampun malinggih/magenah ring karang inucap polih luput ngayah sakirang-kirang nia 6 sasih selaminyatahun nyantosang Wraspati Umanis Wuku Dungulan.
3. Bilih risampun 6 sasih sang nanggap taler nenten malinggih/magenah ring karang inucap, sang nanggap patut ngaturang karang punika ring Desa.
4. Saluiring karang sane sampun katanggapang tur sampun kaayahin tan wenang nagih karang inucap.

Pawos 35
Nyepih Karang

1. Bilih Karang Desa kaepah dados kalih utawi langkungin kacacirinin antuk wates (sengker) napi malih kadulurin antuk pamedalan/pamesuan kabaos karang inucap kasepih.
2. Karang Desa sane kasepih mangda kaunggahang ring ilekita Desa/Banjar tur kasaksinin antuk prajuru Desa/Banjar

3. Krama Desa sane malinggih ring soang-soang karang sane patut nedunin makrama Desa lan Banjar.

Pawos 36
Karang Lan Tegal

1. Sang ngamong karang Desa, karang paumahan, tegal patut ngawentenang wates marupa tembok wiadin pagehan
2. Karang utawi pamegalan patut magaleng kaluanan artinipun magaleng kaler utawi kangin. Sane patut ngardinin wates patut sang madruwe karang/tegal ring tebenan (badelodan utawi badauhan)
3. Yan wenten karang kabebeng patut I parajuru ngutsahaang wenten margi.
4. Yan wenten jadma ngentosang wangken manusa ring pakarangan/tegal lan sapanunggilannya anak sios wenang sang nruwenang sawa ika nyarunin/mrayascita agung/alit manut sastra agama.
5. Yan wenten jadma padem ring pakarangan/tegal anak sios, wenang sang nruwenang sawa ika nyarunin/mrayascita genahe punika agung alit manut dresta.
6. Yan wenten jadma padem, tan wenten ngankenn sawa ika wenang I para juru masadok ring sang mawa rat.

Pawos 37
Tan Wenang

1. Tan wenang ngalah karang karang tegal, margi genah sane sinanggeh suci makadi Kahyangan, setra lan sapanunggilan ipun.
2. Tan wenang ngembahang toya, toyan ujan, toyang wawalungan, toyan pawaregan lan sapanunggilan ipun ka pekarangan anak sios
3. Ngentungan luu, wangken wawalungan ring pakarangan/tegal anak sios
4. Ngentungan tulang manusa ring pakarangan/tegal anak sios.
5. Nunjel/nanem wangken manusa yadiastun marupa sawa karesian ring Desa Pakraman, tegal sawah yan ten polihkabebasan Krama Desa/Subak.
6. Prade wenten manut kocap ring ajeng (1,2,3,4,5) sajabaning kadanda patut mrayascita/caru agung/alit manut dresta miwah sastra agama.

Kaping 2
Pawos 38
Papayonan

1. Ngawit nanem tanem tuwuh patut 2,5 meter ngajeruang saking wates.
2. Yan wenten taru mentik sajeroning wates, patut taru ika kebak, kabagi tiga makadi asiki katiba ka Desa, kakalih sang nruwenang wates.

3. Yan wenten entik-entikan makadi tiing lan sapanunggilannya mentik ngalintangin wates, wenang entik entikan punika kataban/kadruwenang olih sang madue karang sane kaentikan.
4. Yan wenten wit taru ngungkulin ka pisaga, sang kaungkulin kababatan, patut I prajuru Desa, nibakang dadudonan kadi ring sor:
 - a. Sang nruwenang kayu ika notor/nyepat gantungin.
 - b. prade jantos lintangin ring senger dereng kalaksanayang, wenang I prajuru nibakang ring sang katonin notor utai ngebah kayu ika.
 - c. Saang/kayu ika patut katiba rig sang notor
5. Yan wenten wit taru mayonin ke pisaga, I Para Juru patut natasang makadi:
 - a. Yan sadurung pungkut wenten sadu ping tiga tarune kadaut olih sang madue baya, karusakanne katanggung antuk sang maderbe taru.
 - b. Yan maponggol, tarune kaambil antuk sang maderbe, karusakanne katanggung antuk sang maderbe taru, upakarane taler katiba ring sang madue taru.
 - c. Yan pungkut tan patara, karusakane katanggung sareng kalih, upakarane taler sareng kalih, kayune kaepah dados kalih.
 - d. Upakara durmanggala prade wenten rarubuhan.
Akajeng: caru siap aukud saha runtutannya.
Telung Kajeng: Caru Panca Sata saha runtutannya
Petang dasa dua dina: caru Resi Gana saha runtutannya

Kaping 3

Pawos 39

Wawangunan

1. Sakaluring wawangunan mangda kausahayang mangda nganutin kecap asta bumi miwah asta kosala kosali
2. Yan wenten ngawitin ngwangun raris wangunan ika ngalintangin utawi ngungkulin ka pisaga makadi capcapan lan sapanunggilannya, sang kababatan patut malungguhang ring san madruwe wawangunan ika, yan prade sang madruwe wawangunan ika mamengkung, keni I prajuru Desa nyepat gantungin tur madue wawangunan ika ngubar/mongkar tan polih prabia kapocolan.

Kaping 4

Pawos 40

Wawalungan

1. Sahanan warga Desa sane miara wawalungan/ingon-ingon patut siaga inetenin, negul utawi ngandangin mangda tan ngarusak ka pisaga, bilih bilih ngranjing ka pura utawi ka pamerajan.

2. Yan wenten wawalungan leb/malumbar ngarusak utawi polih neda pamula mulan wenang sang nruwenang wawalungan ika kadanda agung alit manut pararem.Sajawaning kadanda kadi ring ajeng taler kasisipang sapengargan pamula mulan sane kateda.
3. Yaning wenten wawalungan makadi banteng, bawi, kuda, kambing muah sapanunggilannya ngranjing ka genahe suci makadi ka pura, merajan, utawi genah suci siosan yadiastun kaetut uri, sang nruwenang wawalungan ika patut kadanda mrayascita/nyarunin genahe sane karanjingin agung/alit manut pararem kalih sastra dresta.
4. Prade wenten wawlungan/ingon-ingon kataban metu padem tan sangkaning gumanti, tur wenten saksi, sang naban ika patut luput saking kaiwangan.

Pawos 41

Tata Cara Nabab

1. Sang nabab patut wenten wenten sakirang kirang ipun adiri tur wenang wawalungan/ingon ingon ika kategulkadedehang kasawenin antuk tatanduran sane karusak saha pramangkin wawalungan ika kaatur ring I prajuru Desa.
2. Yaning wenten ingon ingon ingon/wawalungan kataban jantos rahina (24 jam) nenten wenten sane ngangkenin patut ingon-ingon (wawalungan) ika katur ring sang mawa rat.
3. Salamin wawalungan ika kataban/ magenanh ring I para juru Desa, patut wawlungan (ingon-ingon ika kapiara/kawehin neda, tur kaitung agung/alit pangargan tatedan ipun antuk I para juru
4. Sang nruwenang wawalungan (ingon-ingon) sajawaning kadanda, patut malih katibakang dadendan pangargan tatedan.

Pawos 42

Paoleh-Olehan Nabab

1. Dadudonan tatabanan kabagi tiga kadi ring sor:
 - a. asiki katiba ring I para juru
 - b. asiki katiba ring sang nruwenang abian
 - c. asiki katiba ring banjar/Desa
2. Sajabaning paoli-lihan ring ajeng sang nruwenang patut malih polih pangargan tatedan sane kateda utawi karusak.

Kaping 5

Pawos 43

Bhaya

1. Bacakan panca Bhaya luire:
 - a. Geni Bhaya (puwun)
 - b. Arta Bhaya (kemalingan, kabaak lan sapanunggilan ipun)

- c. Jiwa bhaya (kaamuk lan sapanunggilan ipun)
 - d. Toya bhaya (belabar agung)
 - e. Stri bhaya (kablegandang)
2. Asing-asing I Wong Desa kahanan wiadin manggihin Sang Kahanan bhaya kadi ring ajeng, patut nunas kanti nyuarang kulkul tatepakannya manut pawos 23.

Kaping 6

Pawos 44

1. Yan wenten jatma mamaling utawi ngerusak, sang malaksana kalih genahe sane kalaksanain sajeroning Desa Adat Darmasaba wenang katibakang danda nikel ping 3 saking panganggar barange sane kamaling /karusak.
2. prada barange magenah ring genahe sinanggeh suci makadi ring Pura/Pamerajan lan sapanunggilan ipun sawawaning kadenda kadi ring ajeng patut sang mamaling/ngerusak keni pangaskara marayascita (nyarunin) agung alit manut dresta miwah sastra agama.
3. yan wicara ring ajeng (1) kaputus antuk sang mawarat mekadi Pengadilan jatma ika tan katiban katibanan danda prade kadi munggah (2) patut katibang marayascita (nyarunin) kewannten agung/alit taler manut. dresta miwah sastra agama.

Pawos 45

Pahpahan Dadendan/Panikelan

Dadendam/panikelan patut babagi 3 kali ring sor

- a. Sang neruwenang polih asiki
- b. I Pra Juru/ sang mutusang asiki
- c. Ring Banjar/Desa polih asiki

SARGA IV

SUKERTA TATA AGAMA

Palet 1

Pawos 46

Indik Dewa Yadnya

1. Kahyangan/palinggih-palinggih sane kasungkanin antuk Krama Desa Adat Darmasaba.
 - a. Pura Desa, Palinggih Besakih, Gunung Agung
 - b. Pura Dalem, Prajapati di Br.Cabe, Prajapati di Br.Darmasaba.
 - c. Pura Puseh.
 - d. Pura Taman Cengana.

2. Rahina Piodalan
 - a. Pura Desa, Palinggih/Pasimpangan Besakih, Wraspati Umanis Dungulan, Gunung Agung Purnama Kapat.
 - b. Pura Dalem, Prajapati di Br. Cabe: Buda Umanis Medangsia. Prajapati di Br. Darmasaba Anggara Kliwon Tambir.
 - c. Pura Puseh Anggara Kliwon Juluwangi.
 - d. Pura Taman Cengana Buda Cemeng Warigadean.

Pawos 47

RARAINAN AGUNG

Rerainan sane patut I krama Desa ngaturang puja wali : Saraswati, Banyu pinaruh, soma ribek, Pagerwesi, Sugihan Jawa, Sugihan Bali, Galungan, Kuningan lan Sapanunggil ipun.

Pawos 48

MAMENJOR

1. Ring Rahina Buda Kliwon Dungulan (Galungan) sejaba kacuntaka, patut mamenjor ring lawangnya suang-suang pepek saha upakaranya, nancabang patut ring rahina anggara wage Dungulan.
2. Yan wenten jatma tan nganutin ring ajeng (1) wenang jatma ika kadenda agung/alit manut pararem.

Pawos 49

Rahina Kala Rau Miwah Butha Manoca Tan Wenang Tawur Kasanga

1. Jawaning wenten paitungan sios.
Yan sasih kapitu wuku Dungulan, asapunika taler anggara wage wuku dunggulan nuju tilem tan wenang ngagalung Sahantukan rahina punika kawastanin kala rau.
2. Prade wuku Dunggulan Sasih kasanga, rah 9 tenggek 9 taler tan wenang ngagalung rahina punika kawastanin Bhuta mangsa.
3. Yaning Tilem Kesanga kaanjekang wuku Dunggulan sebanen Budha kliwon Pahang, tan wenang ngaturang sawur kesanga melis patut tileming kadasa nutug.

Palet 2

Pawos 50

Pamangku

1. Ring soang-soang Pura patut kawentenang Pamangku.
2. Ngadegang Pemangku Manut dadudonan :
 - a. Ngawilahan saking turunan utawi waris.

- b. Nunas pawuwus widhi utawi nyanjan.
- c. Papilihan I krama.
- 3. Tan wenang anggon pamangku mekadi
 - a. Cedangga saking wawu medal.
 - b. Kageringan mekadi buduh, sakit ilas lan sapanunggilan ipun.
- 4. Prabia ngadegang Pamangku Kahyangan tiga, sonteng Kahyangan mekadi mapiwintenang katanggung oleh I krama Desa
- 5. Janing wenten kalayu sekar/padem ring jeroan/umah I Pemangku, wenang pemangku ika nyepuh. nanging prabian ipun katanggung antuk I krama Desa.

Pawos 51
Dharmaning Pamangku

Dharmaning pamangku kadi ring sor :

- a. Nitening nuntun kasucian ring kahyangan.
- b. Ngenterang upakara ring kahyangan kalih I krama Desa soang-soang.

Pawos 52
Pikolih/ Petias Pamangku

- a. I Pamangku polih luput ayah mekadi pakaryan ring Desa.
- b. I Pamangku polih wastra nyabran ngatahun.

Pawos 53
Pamangku Kagentosin

- a. Kalayuan/lampus
- b. Pinunas ngaraga manawi sungkan-sungkunan lan sapenunggilan ipun,

Palet 3

Pawos 54

Cuntaka/Sebel

Cuntaka/sebel wenten kalih pawos/luire :

- 1. Cuntaka saking padewekan makadi :
 - a. Ngaraja sawala
 - b. Pawiwahan dereng mabujakala.
 - c. Rare dereng 42 dina/macolong.
 - d. Anaking setri lanji, dereng maprayascita.
- 2. Cuntaka saking kelayu sekar/kematian.

Pawos 55
Suwennya Ngambil Sebel

1. Cuntaka saking padewekan pangambil ipun kadi ring sor :
 - a. Sebel saking raja sawala suwen ipun 3 rahina.
 - b. Sebel saking madruwe putra suwen ipun 42 rahina.
 - c. Sebel saking pawiwahan suwen ipun salaminnya sedereng mabiokawonan.
 - d. Rare wawu mijil suwen ipun 42 rahina.
 - e. Anaking stri lanji suwen ipun salaminnya dereng maprayascita.
2. Cuntaka saking kalayu sekar/kematian kadi ring sor :
 - a. Yan saking sameton banjar pengambilane ngawit saking mendem/ngeseng jantos meprayascita.
 - b. Yan saking purusa suwen ipun 12 rahina.
 - c. Yan ngarepin kanton sajeroning paumahan suwen ipun taler 12 rahina.

Pawos 56

Tan keneng cuntaka wetu saking kalayu sekar/kematian

- a. Sang sampun maraga putus makadi Ida Sang Pandita, Pamangku muah sapanunggilannya.
- b. Ritakala ngaturang Dewa Yadnya sampun mapanggalang sasih.
- c. Babanten/Upakara sampun munggah.
- d. Sameton banjar sadurung ngeseng/mendem.

Palet 4

Pawos 57
Sukertaning Kahyangan

Tan kalugraha ngaranjing sajeroning makadi:

1. Sang kahanan cuntaka.
2. Makta barang sane sinanggeh leteh.
3. Sato ageng : makadi banteng, kuda, kambing lan sapanunggilan ipun sajawaning wenten karya mamuatang sato ika.
4. Wong dura Desa yan tan polih panugrahan I para juru desa.
5. Yan wenten jatma katapak/karauhan patut kapintonin.

Pawos 58
Munggah ring Palinggih

1. Sajawaning Pemangku sane ngamong, jatma tios tan wenang munggah ring Palinggih yan tan polih panugrahan ring I Pemangku utawi ring I para juru Desa.
2. Yan wenang jatma murug pawos ring ajeng kadanda/maprayascita agung alit manut sastra agama.

Pawos 59
Kahyangan Kahanan Durmanggala

Kahyangan kahanan durmanggala :

- a. Kasamber kilap, katiban angin tur pungkut.
- b. Katunuan/puwun.
- c. Karubuhan taru agung
- d. Katibeng lulut
- e. Karanjingan sato ageng
- f. Karanjingan wong edan/buduh
- g. Kasiratang rah manusa
- h. Wong masanggana sajeroning pura
- i. Jatma sampun maketus : mabacin, mawarih
- j. Jatma masanggama lanang sami lanang, istri sami istri
- k. Kahyangan umahin tabuan kulid lan sapenunggilan ipun

Pawos 60
Kahyangan Kacemerin

Kahyangan kabaos kacemerin makadi :

- a. Jatma masalin wastra ring sajeroning pura.
- b. Jatma ngetelong toyan susu, ring sajeroning pura.
- c. Jatma marebat/memisuh ring sajeroning pura.
yan kahanan kadi ring ajeng wenang jatma ika kadanda/marayascita manut lenging sastra agama, agung/alit manut pararen.

Palet 1
Pawos 61
Indik Resi Yadnya

1. Sang pacang mapudgala utawi madwi jati sajuwaning nunas panugrahan sang ngawe wenang (Parisada utawi Kantor Agama) taler patut masadok ring I para juru desa.
2. Para juru inucap patut nitenin/nureksa manut kecaping agama, makadi cedangga, kalih pangelaksanaan nyane makadi sad atatayi, asta dusta lan sapanunggilan ipun saha nyaksinin upakaranya.
3. Sapupute I para juru patut digelis ngentosin purab sang diniksan ring sahanan ilakita antuk biseka kawikon manut panugrahan nabennya, saha kasiarang ring Desanya.

Palet 2
Pawon 62

Pamargin Pitra Yadnya madudonan kadi ring sor :

1. Makingsan ring ibu pertiwi (mapendem), upakarnya manut lenging sastra agama.
2. Atiwa-tiwa utawi ngaben. Sane wenang abenan jatma padem sasampun maketus untu.
3. Ngaben ngalungah. Sane wenang kaabenang ngalungguh jatma sampun mayusa tigang sasih jantos maketus.
4. Jatma alit wawu medal jantos mayusa tigang sasih padem patut pendem tan wenang ngalungah.
5. Jatma sane kaabenang ngalungah utawi padem dereng mayusa tigang sasih, tan patut kalanturang antuk nyekah/ngatma wedana.

Pawos 63

Swa Dharmaning sang kahanan kamatian.

1. Sang kaduhkitan kahanan kamatian patut ngadokong ring I para juru Banjar/Desa, saha nguningayang dinane kapuputang, kalih indik pamargine.
2. Swa Dharmaning Banjar.
I Para juru patut nepak kulkul, maka cihna warga banjare wenten seda.
3. a. Panyanggran banjare nganutin awig-awig banjarnya
b. Busana I krama sane lanang mawastra tur nyalempot asapunika taler sane istri mawastra tur maanteng
c. Pamargin sawane miwah upakarnya mangda dabdab antar tan kalugra magaran/mageguyangan.

Pawos 64
Pamargin Mendem Utawi Ngeseng

Nganutin dewa, kalih tan wenang kadi ring sor:

Tan wenang : Semut sadulur, golongan, prawani, tilem, purnama nyandung, makirim wangke, ngutang tiga sapisan, rarainan jagat, piodalan (Ida Bhatara kanton ngadeg) muah sane siosan manut dresta.

Pawos 65
Ngalangkar Watang

1. Yan wenten makutang ngamarginin margi asiki, dina tunggal tan wenang sane ukuran ngalintangin sane dumunan patut sane dusunan/nampokan sitra mamargi dumunan.
2. Prade wenten jatma murug kadi pawos ring ajeng patut jatma ika kadanda agung/alit manut pararem kalih sastra agama.

Pawos 66

Sawa tan wenang inepang kalih tan keni larangan

1. Anak alit dereng maketus.

2. Sawa ngadut rare/mobot tan wenang nanem ngurugin, kalih ngeseng sane dereng bobotne medal, wenang basah.
3. Sang keni pinungkan ngalalah makadi kolera lan sapanunggilan ipun.
4. Rikalaning jagat keni garubug.

Pawos: 67

PANANJUNG BATU

Yan wenten jatma sios desa matanem / ngeseng ring setra Desa Adat Darmasaba, patut keni pananjung batu agung / alit manut pararem.

Pawos: 68

TATA KERTANING RING SETRA

1. Tan wenang makarya undung-undung gumanti (Kuburan permanen).
2. Tan wenang nanem / nunjel tiga sapisan (arahina) ring setra asiki.
Yen wenten murug kadi ring ajeng keni danda agung/alit manut pararem kalih manut langing sastra agama.

Pawos: 69

NGULAH PATI-SALAH PATI

Ngulah pati salah pati kasuksara tri manggalaning yad- nya makadi; Seng neruwen ang karma, i para juru desa, - pamekas sang muput waras kaanggehang.

Pawos: 70

PANGABENAN

Pangabenana wiyadin atiwa-tiwa goen tigang pawos baba cakan ipun makadi:

- a. Swasta geni (nista).
- b. Sawa preteka (madia).
- c. Sawa wadana (utama).

Pawos: 71

PANGABENAN PAMANGKU

1. Prade Panangku: Desa, Dalem, Puseh, Lampu Sonteng Kahyangan patut kageseng / kaabenan.
2. Upakara katanggung olih santanan ipun.
3. Krama desa wenang.
 - a. Ngayah jantos puput, tan pasangu.
 - b. Soang-soang krama ngamedalang:
 - beras 1 kg
 - taluh a bungkul
 - raramon makadi busung, slepan.

Pawos: 72

PANGERITAN (PANGABENAN SARENG MAKEH)

1. Prade Krama Desa ngalaksanang pangeritan / pangabenan- kadadosang nyambung antuk:
 - a. Masangih ajak kumpulannya.
 - b. Matelu bulanan ajak kumpulannya.
 - c. Macaru ajak kumpulannya.

Pawos: 73

PADEM NUJU RARAINAN GUMI

Yan wenten jatma padem nuju rarainan gumi makadi : Sugi Jawa, sugi bali, Galungan, Kuningan, Ida Bhatara - nyeger ring bale agung, Piodalan ring Kahyangan Tiga miwah sapanunggilan ipun wenang:

1. Mapendem pramangkin, mapengentas tur tan makukulan pamargine wengi utawi sandi kala.
2. Prade santanan ipun mamanah ngecong / ngaben, dados nga ben sasampune inggas rarainan inucap.

Pawos: 74

JADMA KAKENAIN GERING CUKIL DAKI PADEM.

1. Krama banjar tan keni napi-napi.
2. Kapuputang antuk kula wargannya.

Pawos: 75

DHARMANING KRAMA BANJAR

Dharmaning Krama Banjar rikalaning ngamong Pitra Yadnya manut pawos ring ajeng, kadabdab sajeroning awig - awig kalih pararem banjarnya soang-soang.

Palet: 3

Pawos: 76

INDIK NANUSA YADNYA

1. Manusa Yadnya inggih punika upacara utawi upakara manusa ngawit saking patemoning kama petak kalawan kama bang sajeroning garba ngantos lampus ri wekas.
2. Upacara lan upakara kadi ring ajeng madudonan ring sor:
 - a. Magedong-gedongan duk pangerempinian ibiyang, bo- botan mayusa tigang sasih jantos petang sasih.
 - b. Duk sang kama reka wawu embas.
 - c. Kepus udel.

- d. Ngalepas aon risampune mayusa 12 rahina.
 - e. Akambuhan, yusa 42 rahina (macolong).
 - f. Tigang sasih (sambutan)
 - g. Awetuang (aoton: 6 sasih).
 - h. Ngempugin: rikala sampun tumbuh untu.
 - i. Mungguh deha / taruna: macihna yan lanang sampun nge bakin yan istri sampun ngaraja sawala.
 - j. Matatah / mapanes.
 - k. Mawiwaha / madengen-dengen ring grahastana.
 - l. Mawinten utawi maekajati.
3. Upakara lan upacara inucap nista madya utawa manut ka- goenan sang manggalaning yadnya kalih sastra agama lan dresta.

Palet: 4

Pawos: 77

INDIK BHUTA YADNYA

- 1. Indik bhuta yadnya punika, upacara lan upakara yadnya- sane kaatur ring sang bhuta kala.
- 2. Bhuta yadnya punika ketah kabawos macaru.
- 3. Pacaruan inucap: Nista, Madya, Utama manut kawigunan- kadi ring sor.
 - a. Masaiban / mabanten tugu: wusan ngarateng
 - b. Eka sata.
 - c. Panca sata.
 - d. Manca kelud.
 - e. Manca sanak /
 - f. Resi gana.
 - g. Tawur kasanga lan sapanungsilan ipun.

Pawos: 78

TAWUR KASANGA

- 1. Tawur kasanga punika wenten mengubah ipun ring panyepian dudonanan ipun kadi ring sor:
 - a. Yan tan wenten paitungan sios panglong ping 13 (tiga rahina sadereng panyepian) patut melis (malasti):
Pratima / pra lingga kasuciang ka sagara utawi ring genah pabejian wus punika Ida Ehatara nyejer ring Bale Agung.
 - b. Panglong ping 14 Ida Bhatara kanton nyejer ring Bale Agung.
 - c. Ring tileming (panglong ping 15) sasih kasanga kawentenang Pacaruan (tawur kasanga) ring : Bale Agung, Pampatan Agung, miwah ring paumahan soang - soang. Agung / alit manut dresta miwah sastra agama.
 - d. Ring tanggal / sasih kadasa kawentenang panyepian:
Brata panyepian kadi ring sor:

1. Amati geni tan kengin maapi-api sajawaning: madue anak alit (matepetin langka) dereng tigang sasih ring genah langka inucap. Sang matepetin anak sungkan ring genahe sang - sungkan. Sang madruwe layon ring genah sawa inucap.
 2. Amati karya tan wenang nyambut karya.
 3. Amati lalangan tan goen kangin ngawentenang unen-unen tatabuhan asapunika taler jajuden.
 4. Amati lalungan / amati lampah tan wenang malalu- ngan sajawaning pacalang, prajuru tur mangda maceciren wirjadin ilekita.
2. Prade goen murug keni kadanda agung / lungsur manut pararem.
 3. Ri wus panyepian benjangnya ngembak geni.

Sarga V

SUKERTA TATA PANONGAN.

Palot: 1

Pawos: 79

PAWIWAHAN

1. Pawiwahaan inggih punika patemoning purusa lawan prada- na sakalan ipun panunggilan kayun suka cita saha widhi widana manut sastra agama.
2. Pamargin / pangelaksanaan pawiwahan kadi ring sor :
 - a. Papadikan : pakrunan riyin wawu pangambilan.
 - b. Ngarorod (ngarangkat): pangambilan riyin wawu pakrunan.
 - c. Nyeburin utawi nyantana: risampunne kategepin upacara lan upakara.
3. Padadab sang pacang marabian patut:
 - a. Nganutin yusa makadi sampun daha / taruni.
 - b. Sangkaning sami pada rena / pade arsa.
 - c. Prade pangambile siosan agama kamanggala antuk upakara panyambutan lan prayascita.
4. Pamargin parabian inucap mangde nganutin:
UU No 1/1974, PP No 9/1975 Pasuara Gubernur Kdh. Propinsi Dati I Bali.

Pawos: 80

PANGAMBILAN MIWAH SANGGANA TAN PATUT

1. Pangambile lan pasanggaman tan kepatutang ring Desa Adat Darmasaba makadi :
 - a. Ngambil saking papaksan.
 - b. Gamiya: marabi / masanggama sareng sameton sodet, sameton kawalun ring aji / bujang, pekak / dadong, rerama luh / muani waris kenceng (purusa).
 - c. Gamiya gamana masanggama sareng sato
 - d. Badawasa masanggama sami muani, luh sami luh.

2. Yan wenten jatma malaksana kadi ring ajeng. Jatma ika wenang kapalasang tur kadanda marayascita- manut sastra agama, agung alit manut pararem.

Pawos: 81

ANAKING SETRI LANJI / PANAK BABINJAT

1. Yan wenten jatma obot / beling, tan wenten sane ngang kenin bobot punika taler bobot / beling tan pawidi widana pawiwahan raris medal rare pinuka, kawastanin anaking setri lanji / panak babinjat .
2. Yan wenten kadi ring ajeng mangda kautsahayang antuk kulawargannya kadi ring sor:
 - a. Mangda wenten mameras / ngangge pianak, rare ika tur kaprayascita rare kalih biyangnya.
 - b. Prade tan wenten sane meras / ngangge pianak wenang pianak kalih biyangnya maprayascita agung / alit manut sastra agama.
Rikalaning mameras marayascita mangda kasaksinin antuk para juru Dess / Banjar.
3. Prade wenten jatma nganutin kadi pawos ring ajeng (81 angka 1,2) rare kalih biyangnya tan wenang ngaranjing ka pura makadi panyungsungan jagat Desa Darmasaba yan murug wong ika wenang marayascita kahyangan ika agung / alit manut dresta kalih sastra agama.

Pawos : 82

MANAK BUNCING

Yan wenten jatma ngamedalang pianak kembar lanang istri pamargine kadi ring sor :

- a. Prade maari-ari asiki ipun maawak tunggal
- b. Yan waras istri maari-ari ipun maawak istri, asapunika taler prade sane lanang maari-ari ipun maawak lanang tan ngaletahan jagat
- c. Yan pada maari-ari nanging matu maeletan sawiji tunggal juga ngaranya.
- d. Yan metu sadina, sama-sama ari-ari kang setri rumuhun lanang pungkuran. Buncing ngaran (ngaletihin gumi) patut kawentenang upakara Desa manut sastra agama katanggung antuk ikrama Desa, sang neruwenang pianak patut ngupekara ring paumahan ipun manut sastra agama.
- e. Yan metu sadine sami maari-ari, kang lanang metu rumuhun kang istri pungkuran silih asih ngaran tan ngaletahan jagat, kabawos becik, ngawe buwana ayu ring sor luhur. Jatma ika sasampune petang dasa dua dina, kaupakara antuk sasayut tulus ayu, sasayut dirga yusa sasayut pageh tuwuh, muwah parayascita.
- f. Yan langka ika langkungan cincin kakalih mangda kaanutang ring sastra agama.

Pawos: 83

PAWIWAHAN MANGGEH SAH

1. Pawiwahan kaanggeh sah maka cihna dokumen makadi:
 - a. Dewa saksi, cincin widhi widana kaatur Ida Sang Hyang Widhi.
 - b. Bhuta saksi, widhi widana ring sang Bhuta kala (makalan-kalan).
 - c. Manusa saksi: cincin kesaksinin kula warga, pamekas ring para juru kaunggahang sajeroning ilikita tur katemusang ring sang ngawewenang.
2. Upakaran ipun manut sastra agama kalih Dasa Kala Patra agung alit manut kawentenan sang manggalanin yadnya.

Pawos: 84

PAWIWAHAN SILIH TUNGGIL TAN RAWUH

Rikalaning kamargiang pawiwahan tan rauh silih tunggil sahantukan Wenten karya mabuat pisan, makadi wenten ring Dura Nagara, ring payudan miwah sane sios-siosan mungguwing pawiwahan punika lumaksana nanging mangda wenten cariren ipun makadi swalapatra saking sane tan rawuh kalaning natab widhi widana wenang sang sane tan rawuh kagentos antuk pangangge.

Pawos: 85

ASUMUNDUNG LAN ANGLANGKAHI KARANG ULU

Asumundung lan anglangkahi karang ulu tan kabawos iriki nanging tan ngirangin yan prade pakahyun, manah ipun pacang ngamargiang upakara "Mapati wangi".

Pawos: 86

TATA CARA PARABIAN NGANUTIN PAPINANGAN

Yan papinangan pangambilne, pamargine patut dadudonnya manut kadi ring sor:

- a. Pinih riyin sang daha / taruni kaarsayang / kapadik antuk rarainan / kulawarga sang taruna.
- b. Ring sampun sami pada adung, pada nyiriang tresna ka lawan asih daha lan taruna kapastikayang sampun magagelan.
Babaktan rikala mamadik makacihna makaruna: canang / base malungguhan, jambe / buah miwah waras lian-lianan manut dresta.
- c. Ring dina pangambilene irika sang daha mapamit ring aji / biyang nyane tur sang neruwenang daha patut masadok ring i para juru banjar / Dese pinaka saksi, tur nyuarayang kulkul risampun sang kalih matilar saking paumahannya.
- d. Paindakan widhi widana makta pajati kengin ring dina pengambilane, kalih wenang risampun pengambilane manut padewasan sane kasinanggeh becik.

Pawos: 87

TATA CARA MARABIAN NGANUTIN NGALAYAT/NGAROROD

1. Yan ngalayat / ngarorod pangambile, sang daha kaengkebang / raramannyane kemalingan sang daha kagenahang siosan umah sang lanang tur raris kaetutang antuk pamargi kadi ring sor :
 - a. Lumaku.
 - b. Makruna.
 - c. Ngaluku.
2. Pamergine lumaku sakirang-kirang ipun tigang rahina kulawargan sang taruna ngarauhin umah / jeron sang daha gumanti lumaku / ngangkenin ngambil sang daha, taler sagelis ipun sakirang-kirangnya 24 jam / arahina masadok ring i para juru ring genah sang daha kaengkebang.
3. Pamargin makruna kalih ngaluku macihna antuk suwar / lampu, tur rahina kapastiang nganggen suaran kukul / ngetut suaran kukul.
4. Sang neruwenang yan tan cumpu wenang netes / ngawentenang panuriksa tur kasaksinin ring i para juru desa utawi Dinas.
5. Yan macihna pangambilne papaksan/tan gumanti sami lila wenang kapalasang.
6. Dina pawiwahan miwah pamargine tiosan pateh kadi pangambilne nganutin papinangan.

Pawos : 88

TATA CARAMING PARABIAN NYEBURIN

1. Yan pangambilne nyeburin pamargine kadi ring sor :
 - a. Rikala ngaluku patut babawose adung saking raraman taruna kalih daha.
 - b. Genah puput pawiwahan ring genah/jeron sang daha (kaanggehang purusa) kasaksinin antuk i para juru muwah kasiarang ring pakraman tur kaunggahang ring ilekita.
 - c. Makta jauman ring genah/umah sang taruna taler kasaksinin antuk i para juru desa.

Palet : 2

Pawos : 89

INDIK NYAPIAN

1. Pawiwahan prasida palas majalarang :
 - a. Wus mapakurenan riantukan silih tunggil lampus, kabaos sang katinggalang balu.
 - b. Palas majalaran sami lila, utawi mawiwit wicara kabaos nyapian.
2. Sang ayat palas marabian patut atur supeksa ring sang mawarat/Pangadilan Negeri wastu tuntas apadang lantur i para juru nyiarang ring Banjar/Desa.

Pawos : 90

TATA CARANING PALAS MARABIAN

1. Sulus palase marabian prade sinalih tunggil anasarlaku matilar tan pasadok jantos atahun wak purusiya, asta capala, tan prasida adung malih.
2. Prade wicarane katumusang antuk sang lanang.

Sang istri patut macihna/mabukti :

- a. Paradara logika sanggraha.
- b. Amandel sang gama maambul-ambulan jantos nem sasih.
Prade wicara katumusang antuk sang istri patut macihna:
 - a. Drati krama.
 - b. Wandu.
 - c. Tan nyangunin saha tan nguwehin pangupajiwa suwene ngantos nem sasih.
3. Prade wicarane macihna kadi ring ajeng, saha kakukuhang antuk saksi, bukti, ilekita, parabiane kengin kapalasang, yan sampun mahakalih sami cumpu.
4. Yan wenten palas marabian majalaran sami lila saking wicara kaputusan antuk sang rumawos wenang sang palas pinaka nyihnayang dewek marep i para juru Desa/ Banjar.

Pawos : 91

KEBO NGULUWIN KANDANG

1. Yan wenten jatma palass marabian sampun wenten ilekita mawali ring umah ipun keni jatma ika kadanda (nguwalang suaran kulkul) agung/alit manut pararem,
2. Yan wenten jatma maambul-ambulan mawit saking biota sajeroning marabian, mawali kaumah ipun jantos suwennya nem sasih keni sang nampi kadanda, agung alit manut pararem, nanging yan sampun wenten ilikitan ipun wantah wicaran ipun wantah sampun ring tangan sang mawa rat sang nampi dunungan tan keni kadanda.

Pawos : 92

PALAS ADUNG MALIH

1. Yan wenten palas makurenan macihna adung malih patut ngawitan malih ngalaksanayang widhi widana/pawiwahan.
2. Yan wenten kadi ring ajeng, keni jatma ika kadanda ngawaliang suaran kulkul agung/alit manut pararem.

Pawos : 93

SWA DHARMANING BALU

1. Suang-suang balu manut kawongannya, kabinayang makadi
 - a. Balu luh wit saking santana rajeg
 - b. Balu muani kapurusan miwah balu muani nyeburin utawi balu boya santana.
2. Swa dharmaning balu inucap patut
 - a. Ngamanggehang pati brata, tan kengin paradara utawi drati krama
 - b. Nguwasayang waris, guna kaya tan kengin ngadol, ngadeang, makidihang sajawaning polih kabebasan saking pianak utawi kulawarga kapurusan.
 - c. Kangin ngangkat santana, napi malih sampun wenten pidadab sadurung sinalih tunggil lampus.
 - d. Kawenangan mawiwaha malih prade sampun polih kabebasan saking pianak daha/taruna utawi kulawarga ka purusan.

Pawos : 94

BALU TAN PAGEH

1. Balu kabaos tan pageh luire:
 - a. Sangkaning malaksana drati krama utawi paradara.
 - b. Matilat saking paumahan tan pasodok jantos sasih.
 - c. Ngadol, ngadiang, makidihang druwe (waris) tan polih kabebasan saking waris pinih tampek.
2. Yan macihna kadi ring ajeng balu inucap tan polih pon-upon waris wenang matilar saking genahnya.

Pawos : 95

BALU SANTANA RAJEG.

1. Sane kabaos balu santane rajeg mekadi :
 - a. Mawiwit saking pakurennya kaceburin kengin ipun ma wak purusa (lanang).
 - b. Kamulan ipun santana purusa.
- Balu sane munggah ring ajeng tan kening pasuara ring ajeng.

Palet 3

Pawos: 96

INDIK SANTANA

1. Mungguwing santana rajeg wenten kaucap santana rajeg miwah santana paperasan.
2. Prade parabiannya tan ngawetuang santana keningin ngidih santana antuk upacara sakala niskala kawastanin paperasan.
3. Santana paperasan ika mangda miara sane ngangkat dados santana saking kantun urip tur ngupakara sasampune lampus.

Pawos : 97

NGANGKAT SANTANA

1. Ngangkat santana manut dadudonan patut macihna antuk widhi widana ilekita saksi sane pinaka prajuru Desa / Banjar lan kulawarga.
2. Sane mapikahyun ngidih santana patut sakirang-kirang ipun nem sasih sadereng dinane kaperas patut masadok ring para juru Desa/Banjar.
3. I Para juru patut numusang ring sang yogiya/mawa rat tur nyiarang ring wewidangannya.

Pawos : 98

PAPERASAN SINANGGEH SAH

Paperasan sinanggeh sah risampune maka cihna kadi ring sor :

- a. Nenten wenten sane nyangkutin.
- b. Widhi/upakara.
- c. Kasaksinin antuk sameton pinih tampek saking sang kaperas lan sang mameras kalih para juru Desa lan Dinas saha kasiarang ring paruman.

Pawos : 99

SANE PATUT KAPERAS

Sane patut kaperas anggen santana makadi :

- a. Jatma maagama Hindu.
- b. Kulawarga saking purusa, yan tan wenten kengin saking pradana (wadon).
- c. Kengin ngangkat santana langkungan ring adiri.

Pawos : 100

INDIK WARISAN

Sane kabaos warisan inggih punika tatamian sane marupa :

- a. Druwe tengah.
- b. Karang paumahan, tegal, miwah carik.
- c. Arta berana.
- d. Pamerajan dadia, miwah pura len sapenunggilan ipun.
- e. Paguna kaya, tatadan/jiwa dana, utang piutang lan sa- penunggilan ipun.

Pawos : 101

SANE KABAOS AHLI WARIS

Sane kabaos waris mekadi :

- a. Perti santana saking purusa/pradana rajeg paperasan.
- b. Turunan purusa pernah ngunggahang makadi rarama nyama, misan, mindom.
- c. Turunan purusa pernah kasamping makadi kaponakan, misan, mindon.

Pawos : 102

DHARMANING WARIS

1. Narima saha ngutsahang tatamiam saking kulawarganya.
2. Ngabenang ngalantur ngatma wadana/nyekahang sang sane kawarisan.
3. Nawur/nampi utang piutang lan sapenunggilan ipun.
4. Sang pacang ngawarisane patut ngupa pira/miara sang sane kawarisin saking kantun urip, tur magenah ring umah/jeron nya.

Pawos : 103.

WAWARISAN SANE TAN KENGIN KAPAH ? KAEDUM UTAWI KAADOL.

1. Marajan/sanggah.
2. Pustaka makadi : Keris , tumbak/cakepan, lan sapenunggilan ipun.
3. Sane patut ngeraksa/ngupapira wantah santana sane nga mong karang desa/ ayah ngarep.

Pawos : 104

JATMA TANPA WARIS

1. Prade wenten jatma tan madue waris utawi nenten mere sida yang nyantenang waris prada ipun lampus wenang, banjar/Desa muputang/ngupakara ngabenang ngalantur ngatma wadana.

2. Indik warisan : karang paumahan, tegal, carik miwah sapanunggilan ipun kagambel/karaksa olih 1 banjar / 1 desa.
3. Prade karang ayahan jaga kapatanggapang tata sulur nganutin "matanggapang karang desa"

Pelet 1

WICARA LAN PAMIDANDA

Pawos: 105

INDIK WICARA

1. Sane wenang maosin wicara ring Desa Adat Darmasaba wakil-wakil Banjar lan Prajuru Desa Adat pinaka kertha Desa.
2. Kertha Desa kapalih makadi.
 - a. Kelian Banjar Adat (Patus) pinakan panua prade wenten wicara patunggilan Banjar.
 - b. Kelian Desa Adat pinakan panua prade wenten wicara patunggilan Desa.
3. Prade sang mawicara tan cumpu ring panepas Kelian Desa, Kelian Banjar (Patus) kengin nunasang ring sang mawa rat.
4. Wicara sane kabaosin, Kelian Desa Adat/Kelian banjar (Patus), wicara sane nungkasin daging awig-awis kalih pararem.
5. Nepasin wicara kaangge uger-uger tri pramana (cihna, bukti, keterangan) tur nepek ring catur dresta miwah sastra agama

Palet 4

Pawos: 106

INDIK PAMIDANDA

1. Babacakan pamidanda sane kamanggehang Tri danda luire :
 - a. Arta danda, teges ipun kadanda antuk jinah.
 - b. Dewa danda, teges ipun kadanda antuk pangaskaran (bebanten).
 - c. Jiwa danda, teges ipun kadanda antuk kasepekang ring Banjar/Desa utawi kapatutang ipun nunas pangampura.
2. Arta danda, Dewa danda pumidandanya dados druwen Banjar/Desa.

Pawos: 107

LINTANGAN RING PANUMAYA

1. Rikala wawanengan ngamedalang urunan makadi :

jinah papeson lan sapanunggilan ipun yening sampun lintangan ring panumaya, keni danda nikel sakawit apisan.
2. Risampune keni panikelan mawaneng malih asangkepan taler tan nawur wenang karampag, manut tata cara kadi ring sor :
 - a. Ngamargiang rarampagan i para juru, kami letan ring i krama Banjar/ i krama Desa.
 - b. Sane karampag pinih riyin ubuh-ubuh makadi :

ayam, celeng, sampi lan sapanunggilan ipun.

- c. Yen kantun kirang prabot/palinggihan makadi :
tambah, kandik, radio, TV, sepeda, miwah sapanunggilan ipun.
- d. Yan prade kirang makadi kakayonan sane mentik ring pakarangan, ring
panegalan, miwah sapanunggilan ipun.

Pawos : 108

SANE TAN DADOS KARAMPEG

Sane tan dados karampag:

- a. Prabot paon.
- b. Bale yan ipun madue abungkul.
- c. Marajan kalih panganggen marajan.
- d. Pustaka makadi; Lontar, tumbak, keris lan sapanunggilan ipun.

SARGA VI

NGUWAH-NGUWUHIN AWIG - AWIG

Palet ; 1

Pawos : 109

- 1. Nguwah-nguwuhin awig-awig kamargiang antuk paruman Desa.
- 2. Pamutus babawosan mangda kautsahayang wetu saking pakahyun gilik saguluk.

Pawos : 110

PAMUPUT

- 1. Awig-awig puniki kamanggehang sajeroning Desa Adat Darmasaba.
- 2. Sakaluring sane dereng kaunggahang, sajeroning awig-awig puniki patut
kalaksanayang manut tata cara sane sampun mamargi.
Awig-awig puniki kararemin duk rahina. Wraspati Umanis wuku Dungulan, pang
ping 8 sasih kasa IÇaka Warsa 1910 (7 Juli 1988)

Awig-awig puniki sampun kasungkenin ring rahina Wraspati Umanis Dungulan pang ping 8 sasih Kasa Içaka warsaning 1910 utawi tgl 7 Juli 1988, maka pangentos awig-awig Desa Darmasaba ring rahina Buda Kliwon Dungulan , rah 8 Purnamaning sasih Kasanga Içaka warsa 1903 utawi 10 Maret 1982.


Tur kacaciren antuk :

Kelian Desa Adat Darmasaba


Wakil Kelian Desa Adat


I Putu Arka


DESA ADAT DARMA
KABUPATEN
BADUNG

Darmasaba

I Nym. Kanthi Lasthyawa


Kelian Banjar Adat Penenjoan


(I Wayan Segeg)


Kelian Banjar Adat Darmasaba


(I Nyoman Sepur Wisnawan)


Kelian Banjar Adat Menesa


(I Nyoman Keneng)


Kelian Banjar Adat Cabe


(I Ketut Mita)


KEPALA DUSUN / KELIAN DINAS




KEPALA DUSUN / KELIAN DINAS



KEPALA DUSUN / KELIAN DINAS





Sang sane mungguh ring sor puniki wantah kasudi saking i krama Desa pinaka wakil-wakil Banjar lan Prajuru Desa ngarinci kalih nyusun awig-awig puniki tur kesanggra an tuk Ida Bagus Mayun Ketua BPLA/Badan Pembina Pelaksana-Lembaga Adat Kec. Abiansema.

No.!	Parab	! Malinggih ring!	Keterangan
1 !	I Putu Arka	! Br. Darmasaba	! Kelian Desa Adat
2 !	I Nyom.Kanthi Las	-! Br. Darmasaba	! Wakil Kelian Desa Ad
	! thyawan	!	!
3. !	I Gst Made Ngurah	! Br.Penenjoan	! Wakil Banjar.
4. !	I Made Sunarta	! Br. Penenjoan	! Wakil Banjar.
5. !	I Wayan Segeg	! Br. Penenjoan	! Keliana Banjar Adat
	!	!	! patus.
6. !	I Made Molog	! Br. Penenjoan	! Wakil Kelian Banjar/
	!	!	! adat/patus/
7. !	I Wayan Badra	! Br. Penenjoan	! Kepala Dusun.
8.!!	I Wayan Nami	! Br. Darmasaba	! Wakil Banjar
9. !	I Gst Ngr.Kt Suparta	Br. Darmasaba	! Wakil Banjar.
10.!	I Wayan Sepur Wis-	!	!
	! nawan	! Br. Darmasaba	! Kelian Banjar Adat/
	!	!	! patus.
11.!	I Made Pugér.	! Br.Darmasaba	! Wakil Kelian Banjar
	!	!	! Aadat/patus.
12.!	I Ketut Mandra	! Br. Darmasaba	! Kepala Dusun.
13.!	I Wayan Regeg	! Br. Menesa	! Wakil Banjar.

No.!	Parab	! Malinggih ring!	Keterangan
14.!	I Made Radug	! Br.Menesa	! Wakil Banjar.
15.!	I Nyom.Keneng	! Br. Menesa	! Kelian Banjar
!	!	!	! Adat/patus.
16.!	I Wayan Peggeg	! Br. Cabe	! Wakil Banjar.
17.!	I Wayan Suranata!	Br. Cabe	! Wakil Banjar.
18.!	I Wayan Ribut	! Br. Cabe	! Wakil Banjar.
19.!	I Made Mastua	! Br. Cabe	! Wakil Banjar.
20.!	I Made Pugug	! Br. Cabe	! Wakil Banjar.
21.!	I Wayan Puger	! Br.Cabe	! Wakil Banjar.
22.!	I Ketut Mita	! Br. Cabe	! Wakil Banjar.Ada patus.
23.!	I Made Ruka	! Br. Cabe	! Wakil Kelian Ada
!	!	!	! /patus.
24.!	I Nyoman Dobel	! Br. Cabe	! Kepala Dusun.
25.!	I Wayan Rugeg	! Br.Cabe	! Penyarikan.
26.!	I Made Sukadana	! Br. Darmasaba	! Kelian Gede.